

Na osnovu člana IV.B.7. a) (IV) Ustava Federacije Bosne i Hercegovine, donosim

## UKAZ

### O PROGLAŠENJU ODLUKE O PRISTUPANJU IZRADI PROSTORNOG PLANA FEDERACIJE BOSNE I HERCEGOVINE ZA PERIOD OD 2002. DO 2022. GODINE

Proglašava se Odluka o pristupanju izradi Prostornog plana Federacije Bosne i Hercegovine za period od 2002. do 2022. godine koju je donio Parlament Federacije BiH na sjednici Predstavničkog doma od 21. maja 2003. godine i na sjednici Doma naroda od 28. maja 2003. godine.

Broj 01-258/04  
31. marta 2004. godine  
Sarajevo

Predsjednik  
**Niko Lozančić**, s. r.

Na osnovu tačke c) Amandmana VIII na Ustav Federacije Bosne i Hercegovine, član III.2.c) ii), a u vezi sa članom IV.A.20 (1) k) Ustava Federacije Bosne i Hercegovine, člana 9. stav 6. Zakona o prostornom uređenju i prijedloga Vlade Federacije Bosne i Hercegovine sa sjednice, održane 03.10.2002. godine, Parlament Federacije Bosne i Hercegovine na sjednici Predstavničkog doma, održanoj 21. maja 2003. godine, i na sjednici Doma naroda, održanoj 28. maja 2003. godine, donosi

## ODLUKU

### O PRISTUPANJU IZRADI PROSTORNOG PLANA FEDERACIJE BOSNE I HERCEGOVINE ZA PERIOD OD 2002. DO 2022. GODINE

#### Član 1.

Pristupa se izradi Prostornog plana Federacije Bosne i Hercegovine za period od 2002. do 2022. godine (u daljem tekstu: Prostorni plan FBiH).

Prostornim planom FBiH bit će utvrđeni dugoročni opći i posebni ciljevi i mjere prostornog razvoja u skladu sa ukupnim privrednim, društvenim i historijskim razvojem od značaja za Federaciju BiH.

Utvrđuju se prvenstveni javni interesi, usklađivanje pojedinačnih interesa s javnim interesom, koordinacija sektorskih politika, te usklađivanje i provedbenost planiranih prostornih rješenja.

Prostorni plan FBiH sadržavat će politiku korištenja zemljišta i usmjeravati razvoj funkcija i djelatnosti u prostoru Federacije BiH koje su od zajedničkog interesa za narode i građane Federacije.

Postupak pripreme, izrade i sadržaj Prostornog plana FBiH utvrdit će Vlada FBiH na prijedlog Federalnog ministarstva prostornog uređenja i okoliša posebnim aktom o jedinstvenoj metodologiji za izradu dokumenata prostornog uređenja, uz prethodno pribavljena mišljenja kantona.

#### Član 2.

Prostorni plan FBiH se izrađuje za cjelovito područje Federacije Bosne i Hercegovine.

Prostorni plan FBiH se donosi za period od 2002. do 2022. godine s posebno razrađenom etapom za period do 2006. godine.

Po isteku dvije godine od donošenja Prostornog plana FBiH o stanju prostora na području Federacije BiH i kantona radit će se izvještaj o stanju u prostoru (u daljem tekstu: izvještaj).

Izvještaj će sadržavati analizu provedbe dokumenata prostornog uređenja i drugih dokumenata, ocjenu provedbenih mjera i njihove učinkovitosti na svrsishodno upravljanje prostorom, na zaštitu vrijednosti prostora i okoliša, te druge elemente od značaja za prostorno uređenje.

### Član 3.

Na osnovu izvještaja Parlament donosi dvogodišnji Program mjera za unapređenje stanja u prostoru - Program mjera prostornog uređenja Federacije BiH (u daljem tekstu: Program mjera).

Program mjera sadrži ocjenu potrebe izrade novih, odnosno izmjenu i dopunu postojećih dokumenata prostornog uređenja, potrebu dobavljanja podataka i stručnih podloga za njihovu izradu, te druge mjere od značaja za izradu i donošenje tih dokumenata.

Programom mjera može se utvrditi potreba uređenja zemljišta od značaja za Federaciju BiH, izvori finansiranja njegovog uređenja, te rok u kojem je određeno zemljište potrebno urediti za planiranu namjenu.

Programom mjera, ovisno o posebnim obilježjima prostora za koje se donosi, utvrđuju se i druge mjere za provođenje politike uređenja prostora i dokumenata prostornog uređenja.

### Član 4.

Prostorni plan Federacije BiH radi se na osnovu korištenja prostora Federacije BiH (u daljem tekstu: Prostorna osnova Federacije).

Prostorna osnova Federacije sadržavat će snimak i ocjenu postojećeg stanja u prostoru od značaja za Federaciju BiH, kao i osnovne smjernice planiranog prostornog razvoja. Prostorna osnova Federacije bit će sintezni prikaz postojećeg stanja prostornog uređenja - sintetska karta stanja u prostoru.

Prostornu osnovu Federacije donosi Vlada Federacije BiH na prijedlog Federalnog ministarstva prostornog uređenja i okoliša.

Za izradu Prostorne osnove Federacije Bosne i Hercegovine koristit će se podaci iz analitičko-dokumentacione osnove i studija resornih područja. Drugi izvori podataka i dokumentacije su Prostorni plan Bosne i Hercegovine za period od 1981. do 2000. godine (osim odrednica koje su u suprotnosti s Ustavom FBiH i administrativno-političkim ustrojstvom Federacije BiH), Projekt strategije razvoja industrijske politike Federacije BiH, Transportna i energetska infrastruktura u jugoistočnoj Evropi, Srednjoročna strategija poljoprivrednog sektora za Federaciju BiH, Strategija obnove i razvoja kantona i gradova i slično.

Putem Prostornog plana FBiH vršit će se međusobno usuglašavanje planova, programa i projekcija razvoja pojedinih područja od značaja za uređenje prostora Republike Srpske, susjednih država i drugih područja.

### Član 5.

Zakonodavna tijela kantona bit će dužna u roku od 60 dana dati mišljenje o Prijedlogu Prostornog plana FBiH i Programu mjera, a u slučaju nedostavljanja mišljenja smatrat će se da je ono dato, odnosno da nema primjedaba na predložene dokumente. Prostorna osnova Federacije BiH, Program mjera i Odluka o provođenju Prostornog plana Federacije BiH sastavni su dijelovi Prostornog plana FBiH.

Sredstva za pripremu, izradu i praćenje Prostorne osnove Federacije, Prostornog plana FBiH, Programa mjera i dvogodišnjeg izvještaja osiguravaju se u budžetu Federacije BiH.

Rok za izradu Prostornog plana FBiH je dvije godine.

Prostorni plan FBiH kao dokument od značaja za narode i građane Federacije donosi Parlament na prijedlog Vlade FBiH.

### Član 6.

Nosilac pripreme za izradu Prostornog plana Federacije BiH je Federalno ministarstvo prostornog uređenja i okoliša.

Nosilac pripreme za potrebe stručnog praćenja, usmjeravanja i utvrđivanja koncepta prostornog uređenja Prostornog plana FBiH i prostornih planova formirat će Savjet plana (u daljem tekstu: Savjet) sastavljen od stručnih, naučnih, javnih i drugih lica koja će biti odgovorna za sve faze izrade Prostornog plana FBiH.

U sastav Savjeta obavezno ulaze, pored predstavnika federalnih ministarstava i predstavnici svih deset kantona Federacije Bosne i Hercegovine, kao i predstavnici resornog ministarstva Vlade Republike Srpske.

Savjet daje mišljenje za svaku fazu Prostornog plana FBiH (prednacrt, nacrt i prijedlog), te u slučaju sukoba sektornih interesa, interesa među dva i više kantona i interesa cjelokupne FBiH i pojedinih kantona, Savjet će Vladi FBiH uputiti svoje pisano mišljenje.

#### Član 7.

Federalni organi i organizacije nadležni za područja od značaja za uređenje i korištenje prostora, a posebno nadležni za poljoprivredu, šumarstvo, vodoprivredu, rudarstvo, energetiku, industriju, promet, komunikaciju, nauku, kulturu, obrazovanje, zdravstvo, odbranu, turizam, prognanike i izbjeglice, zaštitu kulturno-historijskog i prirodnog naslijeđa, zaštitu okoliša, kao i organizacije koje raspolažu statističkim podacima koji se prikupljaju na nivou Federacije, dužni su nosiocu pripreme za izradu Prostornog plana, s ciljem pripreme Prostorne osnove Federacije Bosne i Hercegovine, staviti na raspolaganje sve informacije, planove, programa i druge podatke o prostoru kojim raspolažu. Podatke i druge informacije, mišljenja i suglasnosti, nosiocu pripreme osigurat će i privredne komore, društva i druga pravna lica nadležna za komunalne djelatnosti, predstavnici vjerskih zajednica, te drugi nadležni organi i organizacije koje zakon na to obvezuje.

Zakonodavna tijela kantona dostavit će nosiocu pripreme sve relevantne podatke i planove prostornog uređenja i razvoja, kao i planove razvoja pojedinih područja za taj kanton. Organi uprave nadležni za poslove prostornog uređenja na svim nivoima, izravno ili neizravno uređuju odnose u prostoru, vode dokumentaciju za praćenje stanja u prostoru, izrađuju i prate provedbu dokumenata prostornog uređenja.

Organi i organizacije iz stava 1. i tijela iz stava 2. ovog člana dužni su odrediti stručno lice kao kontakt-lice s nosiocem pripreme Prostornog plana radi pripreme i dostave podataka i kontinuirane saradnje na izradi materijala u raznim fazama dokumenata.

Osim naknade troškova umnožavanja materijala pravo na naknadu za davanje potrebnih informacija i dokumenata nemaju korisnici sredstava iz budžeta.

#### Član 8.

Nosioc izrade Prostornog plana FBiH je Vlada Federacije Bosne i Hercegovine (u daljem tekstu: nosilac izrade).

Nosilac izrade dužan je dokument prostornog uređenja izraditi u skladu sa zakonom, propisima donesenim na osnovu zakona, te u skladu sa odlukom o pristupanju izradi dokumenata i svih drugih važećih propisa i podataka koji su značajni za područje Federacije Bosne i Hercegovine.

Nosilac izrade može povjeriti izradu Prostornog plana FBiH pravnom licu/licima registriranim za vršenje prostornog planiranja koje izabere putem javnog natječaja. Izabrano pravno lice/lica putem javnog natječaja mogu angažirati potrebne eksperte za rad na izradi Prostornog plana FBiH.

#### Član 9.

Razmatranje i rasprava o Prostornom planu FBiH u raznim fazama njegove gotovosti (dovršenosti) obaviti će se s društvima i udruženjima iz područja prostornog planiranja, prostornog uređenja i urbanizma.

Za njegovu dostupnost razmatranju svakom pojedincu na području Federacije BiH utvrditi će se način odvijanja i trajanja razmatranja i rasprave o Prostornom planu FBiH pomoću svih raspoloživih načina i sredstava suvremene tehnike i komunikacija.

Razmatranje i rasprava obaviti će se u skladu sa Odlukom i programom javne rasprave i to najmanje dva puta u fazi nacrtu i u fazi prijedloga dokumenta.

Kada Prostorni plan bude usvojen u fazi nacrtu rok za javnu raspravu je tri mjeseca.

#### Član 10.

Ova odluka stupa na snagu danom objavljivanja u "Službenim novinama Federacije BiH".

Predsjedavajući  
Doma naroda Parlamenta Federacije BiH  
**Slavko Matić**, s. r.

Predsjedavajući  
Predstavničkog doma Parlamenta Federacije BiH  
**Muhamed Ibrahimović**, s. r.